



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 5

Yangia anidakangma :

Tir Yimyim

tiryimyim@aolima

tir yimyim

TAPAK 8

Nepal nunger pastor ka kum ka piyong tepuokdak ayutsu

Advisor Tovihoto-i 9th Horsepower Challenge tenzüksü



VOL. XXI NO. 07 (ADOK 07) DIMAPUR

KÜPTOKNÜ (SATURDAY)

MONGPUTENI (OCTOBER) 14, 2023

₹ 5.00

## Kiren Rijiju-i Mizoram election in-charge inyaksü

**Aizawl, October 13, 2023 (Agencies):** Union Minister Kiren Rijiju-i Mizoram assembly election nung election in-charge inyaksü atema Bharatiya Janata Party (BJP)-i shimba osang metetdaksü

BJP-isa Nagaland Deputy Chief Minister Yanthungo Patton aser National General Secretary Anil Antony na election co-incharges shimogo.

Mizoram state Assembly election agitsü jakdang Congress lenir Rahul Gandhi-i October 16 nü Mizoram semdangtsü.

Rahul Gandhi-i Mizoram nung anogo ana mongzüksü ta osang angazüker.

"Rahul Gandhi-i October 16-18 tashi Mizoram semdangtsüba

pelar. October 16 nü Rahul-i Chandmari junction nungi Treasury Bhawan tashi nübertem den külemi jaja sensaksemtsü. Iba mapang pai linük aser Mizoram tajungba renloka aotsü atema temeim, yimjung aser secularism osang lemsateptsü" ta AICC Media Coordinator & Mizoram In-charge, Mathew Anthony-i ashi.

October 18, 2023 nü Aizawl Press Club nung Rahul Gandhi-i osangbener den senden ka amenba sülen Delhi-i aotsü ta Anthony-isa ashi.

Mizoram nung November 7 nü polling asütsü aser December 3 nü votes azüngtsü ta Election Commission of India (ECI)-i October 9 nü metetdaksa liasü.

## Manipur kaketshir 2 tepsetba tasa atongsang apu

**Imphal, October 13, 2023 (Agencies):** Manipur nung kaketshir ana apuba aser tepsetba tasa atong ta tongti süa tai tonglokja aliba nisung puogo.

Central Bureau of Investigation (CBI)-i Pune nung iba nisung apu aser pa ya Paolunmang ta jangjaogo.

CBI special investigation team-i pa apuba sülen Guwahati, Assam-i yok. Idakji pa okadaki anir ao aser October 16 tashi CBI ket nung ayutsü temelaba agütsüogo.

Paolunmang-i iba tasa

atonga inyak ta CBI-i bilemer. Iba ken o dak sendakba nung October 1 nü CBI-i tebur ana- Paominlun Haokip o Smalsawm Haokip aser tetsür ana- Lhingneichong Baitekuki o Tinneihling Henthang na apu. Parnok ya Churachandpur district nung apu aser iba sülen Guwahati-i anir ao.

Manipur nung kaketshir ana ya July 6 nü sama. Iba sülen September 25 nü social media nung tena indang noksatem prokshiba sülen Imphal nung kaketshirtemi lungkak aittsü tenzuka liasü.

## Hornbill Festival 2023 atema renemshir



**Kohima, October 13, 2023 (DIPR):** Chief Secretary J. Alam, IAS-i October 13, 2023 nü Hornbill Festival 2023 atema line department ajak den ka menogo.

Chief Secretary Alam-i department ajak amaliteptsü aser local entrepreneurs yaritsü atema jembu.

Kohima aser Kisama tsüngda gari lenmang kanga mejungi lir anungji Public Works Department (PWD)-i mapang shitak nung lenmang anepalutsüla ta paisa ashi.

"Asenoki tourists teimba arudaktsütsü atema sentongtem atongtsüla aser iba nung department shiai pei pei akokba mapatem inyaksüla. Hornbill Festival nung biodegradable products dang amshitsüla aser plastics noktangtsüla" ta Alam-

isa ashi Senden nung Tourism Secretary Nchumbemo Lotha-i Kisama Heritage Village nung maparen balala inyaka aruba osang lemsatep.

"Pochury Naga mesüra Rengma Naga kini benjung lapoktsü maongka angutsü. Ano kin ajak nem anepdang aser nikongdang sentongtem nung shilem agitsü maongka agütsütsü. Festival calendar nung enoksemtsü atema Department ajaki pei pei mapa inyakba osang agütsütsü ayongzüküer" ta Nchumbemo-i ashi.

Information and Public Relations Director Dzuvinuo Thenuo-ia tang mezüng atema open video/vlogging competition agitsüba osang lemsatep.

Külen, TAFMA Project Director Dr. Hovithal Sothu-ia contemporary Art Gallery lapoktsüba osang metetdaksü.

Tanü senden nung Art & Culture, Tourism, Industries & Commerce, Honey Mission, PWD aser RD department tem nung ketdangsurtem aden.



October 13, 2023 nü Israeli artillery unit-i Gaza Strip tsütsü khaloktsüdang agiba noksa ka angur. Israel aser Hamas tsüngda tanü agi anogo tenetbuba raraa arudang Palestine nunger 1,799 süogo aser 6,388 yirua lir. Israel sepaitemi Hokolbarnü Gaza anüdoklentip tsütsü aliba Palestine nunger dang anüolentip leni aotsü tetuyuba agütsüogo. Hamas-ibo par nübertem dang iba tetuyuba sülen manidaktsü metetdaksü aser Palestine President Mahmoud Abbas-ia US Secretary of State Antony Blinken dang tashiyim agi pei talidak toktsür aotsü ashiba magizüküer ta shia liasü. Ajsüaka Israel-i tetuyuba agütsüba sülen Gaza nung Palestine nunger, kar gari nung aser kar tetsüng agi anüolentip tsütsü apusoa aotsü tenzükogo.

## NEP 2020 aser Pedagogic Reforms atema shisa lemsatep

**Kohima, October 13, 2023 (TYO):** Nagaland Education Association (NEA)-i Hokolbarnü National Education Policy (NEP) 2020 aser Pedagogic Reforms in Nagaland atema shisalemsatepba sentong ka agiogo.

State College of Teachers Education (SCTE) Kohima nung agiaba sentong nung shisalen sayurtemji SCTE Associate Professor Dr Bendangyapangla aser Department of Teacher Education, Nagaland University Kohima Campus, Meriema Associate Professor Dr Prasanjit Pal na liasü.

"NEP 2020 ya mapang shitak nung yanglu saka tajanzüktem ano memetet. Education system nung temelenshitem nungdaker

aser asenoki asen dak apet melenshitsu tangatetba alitsüla" ta Dr Bendangyapangla-i ashi.

"NEP kübok course tem enoksemba ajanga education system nung multi-disciplinary studies alitsüla. NEP mapa tenzükba ajanga temelenshi alitsü saka local oshitem amshiba nung timtem ajurutsü kechiyong Nagaland nung kin 17 indang oshi balala lir" ta Dr Pal-ia ashi.

"NEP 2020 mapa tenzükba sülen tesayurtemi iba nung policy alibatam shisadangtsüla aser kaketshirtem tim matemtsüsa curriculum yanglutsüla" ta NEA president Dr Zhavise Rume-i ashi.

"Tesüiba nung subject teachers balaka maliasü aser

school nung tesayurtem aser kidang tsüraburtemi kaketshirtem dang subjects balala sayu. NEP 2020-ia kasa tangatetba nung rangloka lir aser India ya shiametetba loktiliba ka kümdaktsütsü atema nükjidong lir" ta pai ashi.

NEP 2020 ya policy tajung ka lir aser iba ajanga kaketshirtem aser linük atema tarutsü tajung yanglutsü, ta SCTE Associate Professor Dr Neizekhonuo Liezietsu-ia ashi.

"Shisaliok wadang nung alir ajaki NEP nung lateta aliba onük ajak jungjunga shisadanga olemteptsüla aser asen loktiliba nung koba tashi kongshitsü ta asüba angatetsüla" ta Dr Neizekhonuo-ia ashi.

## NEHU hostel nung Nagaland nungi kaketshir ka merenshi

**Guwahati, October 13, 2023 (Agencies):** North-Eastern Hill University (NEHU) Tura campus nung kaketshir taintemi Nagaland nungi kaketshir ka dak tim mesü merenshia teka sangshi.

Iba kaketshir ya NEHU nung Agri Business Management azüngtsü atema ao aser October 8 nü kaketshir tejentemi pa dak tim masüba mapa inyak ta osang angazüküer.

Kaketshir tejentemi Arabella Hostel nung Nagaland nungi kaketshir takdangi ao aser tashiyim agi pa takdang tazüng kati anir ao.

Parnok maittsü miimbangtsü atema kaketshirtem pa tejak nung lights yaloktsü. Parnoki pa dang Hindi oshi agi tejak shiyutsü ashi saka pai junga mejembitetba agi pa dang mangsa ser tsüngsangdaksü.

Pai parnok dang taochi sayuang ta ashi saka parnoki pa süoshi semzükdaksü. Kaketshiri ashiba iba tatalokba ya parnoki phona nung video agi alitü

nung jagi pai FIR ka benokogo. Iba tatalokba atema Naga Students' Union (NSU)-i NEHU Vice-Chancellor Prof. Prabha Shankar Shukla dang mapa inyaksü aser kaketshir nem temeten agütsütsü takhangba agütsüogo.

NEHU-i mapang shitak nung teinyaktsü meinyakra parnoki NEHU anema lungkak aittsü aser mokdangtsü ta NSU-i metetdaksüogo.

### Angami Students' Union-i aitsür

**Kohima, October 13, 2023 (TYO):** Angami Students' Union (ASU)-i Nagaland sorkar dang NEHU nung Angami Naga kaketshir ka ragging asüba atema tebang aitsü ayongzükogo.

"Arbella Boys Hostel, Chasingre, Tura, NEHU Campus nung Nagaland nungi kaketshir merenshiba aitsür. Iba inyakyim ajanga Naga kaketshirtem lendongi idaktsüba dang masüi saka shisaliok reiu ka

Grievances Cell convenor Thejhalhoukho Thomas Khawakhrie nati sangdong ka nung ashi.

Parnokisa NEHU ketdangpurtem dang aibelenertem merenshitsu aser ozüng amertem danga ozüng tapet kübok parnok aitsütsütsü tayongzükba agütsüogo.

Bangdakpurtemi tang tashi mapa meinyakba osang angashia kanga aoksar. NEHU ya Northeast nung university tajungtem rongnung ka lir saka NEHU campus nung ragging asütsü melar ama bilemer, ta ASU-i metetdaksü.

"Onoki timtem ajuruba kaketshir asoshi kanga sasaa bilemstür aser iba tatalokba atema pai temeten mangu tashi aser Naga kaketshirtem ajak lendong nungi kümzüka ayutsü ta tenangzükba mangu tashi onoki noktaksü. Nagaland state sorkaria iba tatalokba atema tangsa tebang ia inyaktstü dang masüi saka shisaliok reiu ka mapishir" ta ASU-ia ashi.

### DGC Alumni Association ajanga kaketshir nem scholarship agütsü



Dimapur Govt College Alumni Association purtemi senotsü nung timtemer kaketshirtem 12 nem tang nungi ita shia sen Rs.500 küm ka atema agütsütsü sentong tenzükba mapang college tesayurtem aser teyari angur kaketshirtem den alumni pur külemi agiba noksa ka yangi angur. ( Dimapur, October 13,2023).

**Dimapur, Mongputeni/Oct. 13 (TYO):** Dimapur Government College indang Alumni Association ajanga tangatetba tajung nung teyari nüngdaka aliba kaketshir nem scholarship agütsü.

Alumni Association ajanga screening agiba sülen kaketshir 12 nem iba teyari ya agüja liasü. Item kaketshir ya attendance

asert academic tsütsü tajungtem nungi shimteta liasü. Iba sentong nung menden Associate Professor Lily Rino liasü aser College principal Prof Sanjay Sharma-i Alumni Association dang pelaba lemsatet aser lanurtem asoshi tatishitsü tajung yutsüba atema tenüngsang agüja liasü. Nüburtem yaritsü


tejangraba aliba aser College meimba yong iba mapa tajung inyaksü tejangraba aru, ta DGCAA tir K. Temjen Jamir-i ashi.

Pai iba teyari angurtem dang tajungtiba nung azüngtsü ajungshi aser nisung ka sensaker kibong nungi asoyonga takar kumer asütsü akok, ta ashi.

### HIV tashidak alirtem dangar ama litettsü

**Dimapur, Mongputeni/Oct. 13 (TYO):** HIV ya tetsübotsü tashidak ka masü saka anepalutetba tashidak ka lir aser HIV tashidak alirtema takum shidak litettsü, ta tanü Anti-Retroviral Therapy (ART) Plus Centre, District Hospital Dimapur Dr. Hotoka Hesso-i ashi.

HIV tashidak alirtem mapang shidak nung temang repranga anema liteter. ART mozü ya angati agütsür, aser iba yongji ART treatment nung terenlok lir, ta District Hospital Dimapur nung ART indang Treatment Literacy Workshop alidang Dr. Hesso-i ashi.



Tesüba küm ter tsüngta AIDS tashidak agi asüba ajemaka Dimapur nung HIV/AIDS tensa taoksatsüka lir. Dimapur nung ita shia HIV tashidak nisung 90 nungi 100 tsüngta dak puteter. Item ya shilem 90 bo shi

nung medemba ajanga menatepba lir. Temesepba mozü amshiba nungi iba tashidak menatepa aoba ya shilem trok agi timba kumogo, ta pai ashi.

AIDS tashidak ajanga asür ajemaka cancer, temesen, diabetes, cardio vascular ama AIDS masüba tashidak agi asür timba kumogo, ta Dr Hesso-i ashi.

Iba workshop ya Network of Naga People Living with HIV and AIDS (NNP) ajanga PND+ART Foundation, Vihaan CSC Dimapur aser Social Welfare Department den lungjemer ayongzüka liasü.

### Immunization Campaigns atema KDTF senden amen

**Dimapur, Mongputeni/Oct. 13 (TYO):** Jila aser yimtsüngtem nung densema Kohima District Task Force for Immunization pur Intensified Mission Indradhanush (IMI), Measles-Rubella (MR) Elimination Drive, aser Routine Immunization (RI) inyakym jembitsü senden ka October 12, 2023 nü DPDB Kohima indang Conference Hall nung mena liasü.

District Programme Officer, Reproductive and Child Health (RCH) aser Universal Immunization Program (UIP) Kohima, Dr. Khrievilhou Nakhro ajanga Intensified Mission Indradhanush (IMI) 5.0 aser MR Elimination Drive indang osang agüja liasü.

Item sentong nung takok tulu lir aser coverage rate shilem 95 dak tema lir, ajisüka nisung kar taliba tesem melenshiba,

vaccine agitsü memolungba aser vaccine agütsüba mapang shiranga aliba ajanga vaccine magütsüteti lir, ta pai ashi.

Kohima district nung item campaign ya August ita tenzük aser October 14, 2023 tashi agitsü.

October 9 nungi 14, 2023 nung final round mapang tanüngba nisungtem awajemtsü imlar, ta Dr. Nakhro-i ashi.

(Maneni tapak 8 nung...)



24th World Sight Day nüngtem nung Ungma PHC nung arishi küm 50 nungi tema pur asoshi awareness cum screening camp ka October 12, 2023 nü "Love your sight at work" omen nung ajemdaker ayongzüka liasü. Iba camp nung nisung 95 tenük repranga mozü angati agüja liasü.

### Mokokchung district kübok pensioner dang metetdaksür

**Dimapur, Mongputeni/Oct. 13 (TYO):** Mokokchung district kübok Old Age, Widower Disability Pensioner shirnoksa payment period September 21, 2023 nungi October 11, 2023 tsüngta pei pension magizüki ali, parnok dang tekeratiba nung District Welfare Office, Mokokchung nungi office lapoka aliba mapang anepdang 10:00 ako nungi nikongdang 2:00 ako tsüngta agizütsü metetdaksü. Active Bank Account alirtem dangi pension teyari ya tsünglanglen agüja aliba

- anogotem yokogo:
- 1. Nagaland Rural Bank - 1st September, 2023
- 2. Indian Bank - 4th September, 2023
- 3. NStCB Ltd - 5th September, 2023
- 4. IDBI - 6th September, 2023
- 5. Bank of Baroda - 15th September, 2023
- 6. SBI - 16th September, 2023
- 7. Canara Bank - 18th September, 2023
- 8. Central Bank of India - 25th September, 2023

### NEISSR nung 8 buba Graduation Day agi



**Dimapur, Mongputeni/Oct. 13 (TYO):** North East Institute of Social Science and Research (NEISSR) pur 8 buba Graduation Day sentong October 13, 2023 nü Peace Centre, Chümoukedima nung agia liasü.

Iba sentong nung tongti tesemdang ama Nagaland Angh La Ganesan aser tesemdang tongti ama Bishop of Kohima Diocese aser Chairman, NEISSR, Most Rev. Dr. James Thoppil dena liasü.

NEISSR ya Bishop of Kohima Diocese ajanga "Excel in knowledge & Service" omen kübok ketdang asür aser Nagaland University nung affiliate süa lir. Iba sentong nung 2021-2023 batch nungi kaketshir 32 tashi graduate süa liasü.

Kasa sentong nung John Kath nem Best Student Award, Zhovino Kichu nem Excellent Academic Performance Award 2023, Sushoka Assumi nem Best Researches Award 2023 aser Imkongtula nem Best Student in Field Practicum 2023 sempet agüja liasü.

Tongti tesemdang La Ganesan-i iba sentong nung jembidang, ibai shisaliok kija nung masü saka takum nunga alizüng tongtipang ka tongtetba mapang lir, ta ashi.

NEISSR ajanga lanurtem lenmang tajung nung aniteta shisatsü agütsüba aser khuret angatetba senso ka-ka akumba nung yariba asoshi pai tenüngsang agütsü. Pai graduate asüba

kaketshirtem dang khuret angatettsü, dangar dang meimtsü asr alima tajungba kumdaksütsü ajungshia liasü.

Loktiliba nung tayongzüka balala koktettsü asoshi ajak lungjemer inyaksü nüngdaker aser tajemzüka jenjang nung aliba nüburtem yaritsüla, ta pai ashi.

Tarutsü lenirtem renemtsüba nung kaket rejutem shilem pai rateta ashi aser 'forward-thinking, decision-making, peace-building, aser effective communication skills' amala kaketshirdang sayutsü nüngdaker, ta shi.

Dimapur nung Peace Channel-NEISSR ajanga tamangba yimsü balala tsüngta telungjem nung putepa alitsü sayuba asoshi tongti tesemdangeri tenüngsang agüja liasü.

Paisa state terenlok maparen nung shilem agitsü graduate asürtem dang ajungshia liasü.

NEISSR ajanga kaketshir nem shisaliok tajung agütsüba atema tesemdang tongti, Nosazol Charles-i pelaba lemsatet aser graduate asürtem dang pei aser lokti asoshi mapa tajung inyaksü ajungshia liasü.

Pai kaketshirtem dang nükjidong yur ochishia aser dangar dang temeim sayua alitsü nenshia ashi.

Iba sentong nung nisung balalai shilem agiba den graduation candle tsüklokba, NEISSR otsü ashiba aser NEISSR Chairman Most Rev. Dr. James Thoppil nungi tayongzüka ojembia liasü.



## 10-DAY SCREEN ACTING TRAINING

Film and Television Institute of India (FTII) in collaboration with the Department of Information & Public Relations, will be conducting a 10-day training in Screen Acting for ST participants residing in Nagaland.

### ABOUT THE TRAINING

- Movement of Actors
- Improvisation
- Voice/ Speech/ Diction
- Monologue
- Physical Culture
- Sense memory and Imagination
- Observation and Character Study
- Technical Aspects of Screen Acting



### ABOUT THE RESOURCE PERSON

- Anita Salim, is an alumna of FTII, Pune. She has performed in various plays and has been conducting various workshops for students, amateurs and professionals since 1984.
- She co-founded The Phoenix Players, where she is also an actor, mentor and producer.
- She has handled costume design and done mime, dance and storytelling.
- She was the resource person during the first phase of training which was held online.

### TERMS AND CONDITIONS

- Participants should belong to Scheduled Tribe and should be 18 years of age and above.
- There will be no course fee. However, participants are required to pay Rs. 1,000/- at the time of registration.
- Last date of submission: 25th October 2023.
- Certificates will be issued by FTII upon successful completion of the course.
- No TA and DA will be provided.



30th October to  
10th November 2023.



Directorate of Information &  
Public Relations, New Capital  
Complex, Kohima.

Interested candidates may send their details with their ST Certificate to [ipnagaland@gmail.com](mailto:ipnagaland@gmail.com) or contact 88611 60084 for more details.



Department of Information & Public Relations



October 13, 2023 nung New Delhi nung Ato kilonser, Narendra Modi, Lok Sabha Speaker Om Birla aser Inter-Parliamentary Union Tir, Duarte Pacheco nung 9buba G20 Parliamentary Speakers' Summit (P20) nung adentsü atema Yashobhoomi Convention Centre-i arudang tangokba noksa nung angur.

## Hamas-i amakba ya kiralongra lir: MEA

**New Delhi, Mongputeni/ October 13 (Agencies):** Brihostibarnü Ministry of External Affairs (MEA)-i, Palestine nung pei li alitsü, nuchiso alitsü aser Israel den yimjung nung alitsü atema ken o jembitsü India-i maneni ajungshir, ajisüaka tawa Hamas-i Israel amakba yabo kiralongraba mapa lir, ta metetdaksü.

Osangbenertem senden ka nung jembidang Ministry of External Affairs otongdar, Arindam Bagchi-i, "Iba ya kiralongraa amakba lir ta onoki reprangteter. Palestine dak sendakba nung parnok nüchiso alitsü sorkar amenoktsü aser linük temeja ka ama arrtsü lateter Israel den yimjung nung alitsü atema ken o jembitsü India-i ajungshiogo," ta metetdaksü.

MEA otongdar-isa, "India nung ka yiruba onoki jangjaogo. Tang iba nisungbaji hospital nung lir. Tepelatsüji, tang tashi nungbo India nung asüba osang mali," ta metetdaksü.

Israel aser Palestine na tsungda sashia raraba mapang India sorkari linüki meyipa aruner sensotem anir arutsü atema Operation Ajay tenzükogo.

Tang Israel nung kaketshirtem densema India nung 18,000 shi lir.

Israel Ato kilonser, Benjamin Netanyahu-i Ato kilonser, Narendra Modi nem tang tensa osang tongmelang agi metetdaksüogo. Iba sülen pai sangdong ka ajanga, India-i Israel pusemer aser kiralongra tapu ajak aitsür, ta metetdaksüogo.

## Operation Ajay kübok Israel nungi India nung 212 anir aruogo

**New Delhi, Mongputeni/ October 13 (Agencies):** Tang Israel aser Hamas na tsungda raraba mapang nung Israel nungi India nung anir arutsü atema India sorkari 'Operation Ajay' tenzükba sülen mezüngbuba tayimtsü nung India nung 212 linük tonga anir aruogo.

Hokolbarnü mezüngbuba tayimtsü nungji India nung 212 anir arua Delhi atongba mapang nung Union Minister, Rajeev Chandrasekhar-i parnok pelaa agizük.

Israel nung alir India nung kumzüktsü atema inyakba

atema pai Ato kilonser Narendra Modi aser External Affairs Minister S Jaishankar na nem tenüngsang agütsü.

Paisa Israel nungi arur kaketshir kar den jembia liasü.

Israel nungi arur India nungertemia India sorkar nem tenüngsang agütsüba den külemi middle east region nung yimjung alitsü imlar, ta metetdaksü.

Indian Ambassador to Israel, Sanjeev Singla-i, India-i meyipa arunertem ajak yaritsü atema Israel nung Indian Embassy-i meranga inyakdar, ta metetdaksü.

Paisa, Honibarnüa tayimtsü ka Israel nungi India nungertem apusotsü, ta metetdaksüba den külemi

Israel nung aliba sensotem dang ketdangsertemi tuyuba shidak benshitsü metetdaksü.

External Affairs Ministry otongdar, Arindam Bagchi-i, Brihostibarnü Operation Ajay ya External Affairs Minister, Jaishankar-i sangdongba lir, ta metetdaksü.

Paisa, tang India nung Israel nung 18,000 shi lir aser India ketdangsertemi maneni iba tensa mita dang atadar, ta metetdaksü.



October 13, 2023 nung New Delhi nung Haryana nungi aruba aluyimertem den sentong ka nung linük tatong Tir, Jagdeep Dhankhar, pa kinüngtsü Sudesh Dhankhar aser Haryana Minister of Agriculture & Farmers Welfare, Jai Parkash Dalal nung tangokba noksa nung angur.

## Kashmir nung Palestine pusemertemi Israel aser US anema longkak ait

**Srinagar, October 13 (Agencies):** Hokolbarnü central Kashmir kübok Budgam district nung Muslim nungertem Hokolbarnü sarasadem sentong tembangba sülen Kashmiri Muslim nungertemi Palestine nung pusema longkak aitogo.

Parnokisa Israel aser US na anema longkak ait.

Taoba Honibarnü Hamas teloki rockets aika amshia Israel amakba sülen tang Israel sepaitemi Gaza Strip sashia amakba mapang nung Muslim nungertemi longkak ait.

Kashmiri Muslim nungertemi, Israel aser US nati tim masüba nung Gaza nungertem anema inyaker, ta sashia aitsü.

Shia Imambara kima longkak aiterterem jagi 'Ya Allah - Gaza aser Palestine na nung ozü adianu aser aianutem kumzükang' ozülü densema ozülü balala amer liasü.

Longkak aiterterem rongnung Aga Syed Aqeel-i, "Onoki

Palestine nungertem aser rarartem pusemer aser Israel-i tai maket nisungtem anema inyakba aitsür," ta metetdaksü.

Palestine nung pusemer kati, "Taochi maket yimsüsürtem mapang talang kabo malir aser nüburtem timtema mapang talangkabo malir, ta puti otsü ajanga asenok dang kuli sayur. Iba tansütsü ya shingaia mamadoktsüla. Kobi melii Tsüngremi yaritsü ta ni amanger," ta metetdaksü.

Hokolbar sarasadem sentong tembangba sülen Kargil jila nunga nisung noklang aika adenshia Gaza nung alirtem pusema longkak ait.

Hamas kiralongrartemi Israel nung 1,300 shi tepsetba sülen Israel-i tesüiba anogo ishika Gaza amakdang Gaza nung nisung 1,500 dak tema süogo.

Tang tashi nung Gaza nung osangbener trok süogo aser United Nations nung inyakertema nisung 12 süogo.



## TIR YIMYIM YIMOBILEM (EDITORIAL)

DIMAPUR

KÜPTOKNÜ

MONGPUTENI 14, 2023

### Israel ya Khristan lima masü!

**T**ang anogo ishika tsüంగా Hamas teloki Israel amakba sülen Israel nungertemi meyiper Palestine lima nung Hamas teloki yimsüsüba tesem Gaza amakba mapang ya asenok asoshibo Laishiba bushiba mapang amato ka kumogo. Israel ya Abraham, Isak aser Yakob Tsüంగాremi agütsüba tenüంగా aser Tsüంగాremi shimtetba lima, aser kasa Tsüంగాremi dak asenoki amanger, anungji asenokia Israel lima yabo asen lima amai bilemer. Ano, talisa Israel lima nung Yisu aso, asü, arem aser shia aru aser iba tasü madak takok anguba Yisu dak amangertemji asenok lir. Aji oda, asenoki Israel nungerbero ajak Yisu dak amanger Khristan-tem dang asütsü amai bilemer. Iba jagi, asenok yimten lenirtemi dena Hamas aser Israel na raraba ya Khristan-tem o Palestine nung Muslim kiralongrar telok na tsüంగా rarar amai bilema jembiba angashir. Kasaji asenok arogo nungertemi Israel lima ya Khristan lima amai bilema alitsüa akok. Ajisüaka, tang tashi Yisu tenüంగా ayokba agiang chiajemabo alir saka Yisu dakbo mamanger ta asürtemji Israel nungertem ya lir. Parnok ya Yihuda nung, Yisu kangki nung angenlokertem to, tang tashi parnok Yisui Tsüంగాremi chir, Pa asü aser shia aru aser tanaben asenok anii arutsü ta mamanger. Atangji, Israel nung ajaki Yisu dak mamanger ta masü saka Yisu dak amanger Khristan-tem nütsüంగా yongsükji noklang nung shilem 1.9% bo lir. Tetezü Israel lima nung nisung noklang ka shia Khristan nisung ana ta majunger. Ibaji jangjatsü atema, tang Israel lima nung nütsüంగా yongsük lakh 90 shi lir aser item rongnung Khristan nütsüంగా lakh ana ta majung lakh 1.85 shi dang lir. Ibajibo asenok Mokochung district kisüంగా nung aliba nütsüంగా shika dang asütsü. Ibaji dang masü saka Yisu asoba yim Bethlehem aser Lazar aser teyi nung aliba yim Bethany tesemtem yabo Palestine lima West Bank nung lir. Tang raraba ya ilenji masü saka Hamas teloki yimsü asüdak Gaza nung lir. Aji oda, asenoki Israel ya Khristan lima kata ta bilema Yirusalem yimti bushia ao nungbo yangji asenoki Khristan-bo kata majurutsüa akok. Kasaji, Israel lima nung dang among nungbo asenoki Yisu asoba tesema mangutsü. Itemji kodang asenoki bilemdangdir, tang Israel o Hamas na raraba ya Khristan-tem o Muslim nungertem na raraba tongpang ka masü aser ano Israel o Palestine na tsüంగా raraba tongpanga masü. Ajisüaka, Palestine nung Gaza nung alir Hamas telok o Israel nungertem na rarar. Aji oda, Israel nung nütsüంగా yongsük noklang nung ana shilema majung Khristan-tem lir, saka ano Palestine nungbo Palestine nung noklang nung shilem ana shibo Khristan-tem lir. Atangji, Israel lima ya Khristan lima masü ta asüdagji asenok mangmangtsüa akok, saka shitakba tatalokbaji kodang asenoki Laishiba nung bushidangdir, Yihuda nung, pei nübertem Yisui Tsüంగాremi chir ta magizükba agiang kangki nung meta aser tanü tashi parnokibo Yisu dak mamanger. Ibayongjiang, tan October 7 nü Hamas teloki Israel amakba anogo ya Israel (Yihuda) nung asoshibo temeshi amongnü, Sabbath, anogo liasü. Iba temeshi anogo amongtsü asoshi Yihuda nungertemi jelia Hokolbar nübo anogo tesadang ka dang mapa inyaker aser kinunger ajak külemi tasüంగాji kidang sabath amongtsü renemer. Tetezü, Israel nungbo Deobar nü ya mapa inyakba anogo lir. Item ajakji yutsü, Israel nung asoshi tebilemdangtsü kaji, Israel lima takar küma aliba ya tongtibang mapa ana lir, kaji aluyimba aser kaji raliwalirtem aruba ajanga lir. Aji oda, Yisu Israel lima nung soa intet aser yangji sayatenya mapa aika inyaka lir, yangjisa asü aser shia aru ta asüba tesemtem reprangi arur raliwalirtem küm nung lakh 50 shi arur. Itemji anir jajaba, anendaktsüba, chiyonga jemdaktsüba aser parnok oset aser chiyongtsü tapu balala alir aobatem nungi Israel nungertemi senotsü jenti ajangzüktetter. Iba jagi tang tashi Yihuda nungertemi Yisu dakbo mamanger saka Yisu ayokba agi takar küma aliba angur. Aji oda, Israel nung Yisu ya maso ka asüa, tanü Israel ta ajaba lima ya Palestine nung lisem lima takongang ka süla ta bilemer. Item ama ya asenok dang Laishiba sayurtemi junga rateta meshira, atangji, tatem nungbo asenoka aika Khristan masü küma aotsü ana nung lir.

## OLEMSABANG

### Tetsüri tebur agiba meji mesüra asenok awashi talira metetba agi asen oshi samadaksütsü asü?

S. T. Yapang Lkr, Kohima. # 9612800973/9856714829

Alemli nungi tetsürpongi tebur lapitem la kübok yutetsüsa nübu ya agia aru, tenüంగా agibo tebur jaki tetsürlaji agir ta züంగాshir, ajisüaka inyakyim ajak nung tetsürla oshi/sentong nung anishia iba tebusang tali meshizüki arishi tembanger. Itemla armashitsü pur yamaji tetsür nemsä agidaktsür. Alemli ibala ama tia ajuruba jaki tebusangji pa neja akoksaba dangashi pei kin oshi samatsüba kecha balaka mali asü, kechiyong pei yimer tsüంగాda aser pei kin tsüంగాda timba lenbutepa liasü.

Tanü tensa reprangdangra bendanger den lenbua aoba dang masü asen Ao litsü nung dang masü bendang limaa alir, anungji meteta aser memeteti oshiji samatoker, tanga limatem yutsür Kohima aser Dimapur ya asadang nung küm 20 tekübok alir lanur 40% dang tali Ao oshi mangatetsü südi, tanü onük nung 'Ao oshi' ta asüba ya Jungliri 'ainer o' ta, Mongseneri 'Jungli o' ta, pei yim dak jembiba osü masü, tera tanepba agi Jungli Mongsen tsüంగాda angatetepba jembiba dang ya jadi/amshidi.

Ano küm 20 shi süidang Ao litsü adener alir lanur 60-80% shii Ao oshi ya mangatet aser memetet akümtsüsa tang asenoki inyakyim kar inyakdar, kechiyong asen Aor teburtemi agiba tetsürtem nem ang meyiper asen Aor teburtem ya agidaktsüba ama lir, asen Aorsangi tebuttsü oshi jembiteter, ajisüaka tebuttsüibo asen Ao oshi mashi ta lir, tanurtem jakia tebuttsü oshi ang ashi tebu oshi mashi. Meteta aliba kibong ka nung joko tanur tain akümer, tebu jaki tebuttsü den aiür asüdag ajepnütepba yimya kasa to asünungji Nagamese sa jembir. Tang joko tebu mulung nung tesasaba arua tanurtem dang pai 'Ao agi jembiang' tasa ashi, ajisüaka pai mesayu nungji kecha mangateter, 'tebui laoa amajako' ta ashi, tanur jaki "Oba, 'laoa amajako' to ki asi?" ta ang meyiper asüంగాdang. Par kibong meji asen Aor sendendak tanga oshi agi jembitsü asü? Asenoki par kibong lenjii oa tanga oshi agi jembiyonga pa tebuttsür senso agitsü menua mali.

Pa tebuttsü nem agidaktsü nungji memenui pa tebuttsü senso küma aotsü, mesüra moayonga inyakyim aser libaliru ajak tebuttsür senso asütsü, ar mashitsüpur (arishi makatsüpur) yamajisa alir, itemla nübu meji asen kin oshi samatsü asü? Pai tebuttsüji agi anungji oshi shidaktsütsüji pa khuret, ibaji kinunger mesüra asen Ao kin khuret masü.

Mongsener kija lenbuba mesüra Mongseneri tanga kintsür agiba item jaki Mongsenbo shia lir, Ao oshiji timbai shia lir, ano tanüంగా jakia shinüa/angazüknüa ang lir, ajisüaka asenoki lenmang dang shibanger. Ano külen asen kin ya awashi talira metet, nenok danga shia alitsü, kü danga tangar kintsür shirnok asen Aori agi itemla yaki yamaisa asüంగాdangba ajurur, "Ni Aori agi, anungji ni ya Aortsür ta asütsü asü masü? Aser onok ama tanga kintsür nenok Aori agirtem ya Ao mangazükdaktsütsüba sentong kar ali asü koda! Kidang kinungbui Ao mejembir/mashi, Aor sentep, Aor seminar lokti senden nung onok denra onoki mangateter ta tenüంగా atemer Nagamese mesüra English agisa jembir, anungji kibong kümer joko semchir arudi asür, ajisüaka Ao mashi aser onok chirnurtemia mashi, mesüra nenokbo ajak shia aliba agi sentep/seminar balala aliba ya onok asoshi mejeta katsür ama bilemer."

Ano asenoki asen Aor shibai tangar kintsür agi, la denji Ao mejembira asen adianusangji maksütsür, Aor sobaliba nung aliba ama pai tebuttsü nemji Ao shidaktsüa lir sümung asenoki tebuttsü denji tanga oshi agi jembira aji asen adianusangji Aor sobaliba memetetba nübu ka ta aseni maksütsür (iba nung ya teshisadangtsüa lir, Mongseneri tanga kintsür agi, lai Mongsenbo shia lir, ajisüaka Jungli junga mashi, kima yimdong nung Jungliri la ajurura khenkhenbo la lenji oa jembitsüsa akümtsü).

Ni Junglir, kübuttsü Mongsentsür, ozü yimer shibasa kübuttsü den jembidang ainer o (Ao oshi) agi jembir, oda asayar ama ni parnok dang yamaisa ashir "kübuttsüi ni jembiba ajak angatetdar, nai jembibajia angatetsü anungji na timtema ainer o mejembii asen yimer temeja jembir ama ayongayonga jembiang" ta sa ashir, kechiyong pa/la jaki nijii Aor sobaliba memetetba nübu ka ta kümtsür.

Tang Ao lima adener Aor sentepem nung Sunday school, Child aser Lanurtem sentep aser shisatokden sentongtem reprangdangra Ao temeja agi sayubaji 20% majunger. Lanuwa 2008/9 meta CYE/Youth sentepi odang, lanurtemi Ao mangateterji sür English sentep dang agi, sentepa alir rongnung Ao mangateterji 20% shi dang liasür südi, ajisüaka onok ama English mangateter 60% arunüaka oshi mangatetba agi marur liasü. Tanü joko asen oshiji iba dang jenjang tamajungba nung ang odar südi, ajisüaka asen oshiji aseni yanglutsü aser aseni mesotsü, anungji asenok alidak aseni songtemtsü. Tang nungi Aor rongnung Ao oshi mangatetra alitsü, ajisüaka arogoren, yimdenren aser lokti senden balala alidang tanga oshi agi jembia lira na alidak nai noktangang, ni alidakbo ni noktangtsü, asenoki akoktsüba mapabo asen alema meyoktsü, asadena kazür mesüli teinyaker kaka südi. Sentep/seminar tagidak nung noktanger shidi "Hoi, anenang Aor sendendak Ao agi jembiang."

Aor rongnung Ao oshi mangateter timba timba akümtsü, kechiyong Junglir o Junglir na lenbur kibong nungia süngla Ao mashir longsua adokdar, parnok mangateterji sür asen Ao oshi ya mejembiba mejembiba küma aotsü asü? Joko lenmang ka dang, aji Aor sendendak, Aor sentep, shisatokden ajak nung Ao dang jembitsü.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Asenok tatembangputu ka nung aliba kuli maneni sayur: Jeff Kinley



Jeff Kenley

**October 11, 2023:** Laishiba nung keta aliba shin otem nung mongin, Jeff Kinley-i, tang Israel nung raraba ya ajanga asenok ya tatembang putu ka nung alir, ta kuli maneni sayur, ta ashi.

Tatembang putu/anogo temaitsütem indang jembidang tawa kaket tasen "God's Grand Finale" sayasang, Kinley-i, Laishiba nung aliba shin otem nung Israel nung raratsü indang jangjajangja shia lir, ta metetdaksü.

"Laishiba nung rara aser raraba olulu alitsü ta shia lir aser tang alima nung menoknok lendong kanga ataloker. Item ajak ya tang atalokdar. Jungkai Adok kaket nung asenoki

azüngbatem atalokdar, ta ni amanger," ta pai ashi.

Kinley-isa, "Anungji kü melung nung yamai bilemer-iba ya ajanga asenok kanga timtem mapang ka nung alir ta sayur, iba denji külemi shin otem ataloker," ta metetdaksü.

Tan hopta pai Israel nung Tel Aviv yimti semdangtsü sentong liasü, ajisüaka taoba Honibarnü Hamas kiralongrar teloki Israel amakba ajanga iba sentong thinenadok.

70 AD nung Rome-i Yirusalem amakba sülen küm 1,900 lir Israel tanaben asüngsashiba ya sayatenya ka lir, ta Kinley-i ashi.

"Jungkai Adok kaket nung tatembang anogo nung

tatalokbatem dak sendakba nung Israel tongti süa tetshia lir. 1947 küm tashi nungbo nisung aikati ibaji komaser atangji ataloktsü, ta ratamata liasü," ta Kinley-i metetdaksü.

Ajisüaka Holocaust (Germany nung Nazi party-i Yihuda nung jenti tepsetba) tatalokba sülen mapang ka nungbo Israel linük tentet (1948 küm); iba sülen sülen rara-a dang arur.

"Iba mapang nungjagi tenzüka raraba manener, kechiyong Satan aser parnok (Israel) meketa aliba linüktemi parnok nem Tsüngremi Abraham dang nangzükba liji magidaksünü. Iba liji Tsüngremi Abraham dang nangzükba liasü, anungji iba ya atangji ostü jembitsüsa temaitsü lir," ta pai ashi.

Aso 20 tashi Israel nung linük 70 nung prokshia aliba sülen pei limai meyipa arubaji tesüngmangtsüka lir, ta pai ashi.

Paisa, Tsüngremi alima dang Laishiba nung aliba shin otem shisadangtsü atema temaitsü sayur, ta metetdaksü.

"Tejen Lai nung Yona dak alaka ainkar ajaki Yihuda nung temeshi lima nung tanaben adentshitsu shinzüka liasü. Jungkai Adok aser Daniel kakettem nung shia aliba tatembang anogotemji Israel nung meyong li mali tashibo mataloktsü, ta temaitsü sayur," ta pai metetdaksü.

## Nepal nung pastor ka küm ka piyong tepuokdak ayutsü

**October 13, 2023:** Taoba hopta Nepal nung Pastor, Keshav Raj Acharya-i court nem bail temepishiba agüja liasü saka magizük, anungji pa küm ka piyong jail nung puoktsü, ta International Christian Concern (ICC)-i metetdaksü.

Keshav-i Nepal nung Hindu nungertem Khristan yimsü dangi meyipdaksür, ta pa nem tai tonglokja 2020 aser 2021 na nung pa aiben puogo.

2021 küm November 30 nü court kati pa küm ana tepuokdak ayutsü obendang agüja liasü saka yaküm June ita nung jail kümsük küm ka ajemja liasü.

Keshav indang lawyer-i pa atema bail temepishiba aiben agütsüogo saka magizük.

Keshav atema ken o jembitsüri court dang, nisung ka ket nung tamangba yimsü dak sendakba kakettem bena aliba mesüra pa indang tamangba yimsü tangar den lemsatepbaji anti conversion ozüng anema masü, ta jembia aru.

Nepal linük temzüng nung yimsü temeden agüja lir, anungji yimsü dak sendakba kakettem bena aliba mesüra tangar den pei yimsü lemsatepbaji temeden



Pastor Keshav Raj Acharya

alitsüla, ta ken o jembitsüri ashi.

Ajisüaka court-i item ken oji magizük.

Tamalen kasa ken o nung pastor dang senchi 20,000 chiogo.

Nepal nung anti-conversion ozüng kübok aibelenba atema Dolpa nung aliba district court-i Pastor Keshav küm ana tepuokdak ayutsü obendang agütsü saka yaküm temerenshi obendangji küm ka ajemja liasü.

Pastor Acharya-i coronavirus wara dak sendakba osang tai proker, ta pa nem tai tonglokja 2020 küm March 23 nü pa pua liasü.

"2015 küm linük temzüng yanglushiba sülen Nepal nung Khristantemi Arlla 26 ya Khristantem anema inyaksü atema lir, ta bilema liasü aser tanübo Nepal nung Khristantemi iba timtem ya atangji ajangshidar. Linük nung sensotem nem tamangba yimsü temeden agütsünüra anti-conversion ozüng ya agientsüla," ta ICC-i metetdaksü.

Nepal nung Khristantem anema inyakba aser Khristantem amokmerenba kanga bulua kümogo, ta ICC-i metetdaksü.

## ANO GO ABEN TSÜNGREM DEN

### Asenok Tekümzüker

#### T.Ken 140: 1-13

Dawid ano tongpang rara ka ajanga aotsü liasü. Pa tsükchiri amakba nungi kümzüktsü nüngdaka liasü. "O Kibuba, nisung tamajung nungi ni kümzükangma: Shirnoki pei mulungjang nung tasa tamajung asar; maneni parnoki parnok sasa rara asoshi senteper. Per ama parnoki parnok tepu chiradaksür. Ungyang per miim parnok tebang mechi telung nung lir. O Kibuba, tamajunger ket nungi ni kümzükangma; tesashi nisung nungi kümzükangma; shirnoki kü jenjang mekepdoktsü tasa asar" (t 1-4). Dawid tsükchirtemi pa aputsü meyima sang yanglu.

Nai iba tia ajurura kechi inyaksü- tamajung tesashi nisung, na aputsü mazüngi sang yanglur nisungtem? Tsüngremi ne dang angashir ta bilemtetang. "Ni Kibuba dang ashi, Na kü Tsüngrem lir; kü temepishiba ola nung tenarong tenjang, O Kibuba" (t.6). Tsüngremi na tashi itdaksür. "O Tsüngrem, kü tekümtet asoshi tashi tongpang anogo nung nai kü kolak tongbangtsür" (t.7). Na tsükchir anema rarai aotsüsa kümra Tsüngremi na raraba sobutsü sobujang. Tatemsa, Tsüngremi na metenjang. Dawidi Tsüngremi pa metentsü ta sarasadem aser pa tsükchirtem parnok menen agi parnok raksatsütsü.

Dawidi Tsüngrem nem tenüngsang agüja aten. "Ni metet tepetzükba pur asoshi aser sensaker tim mapa asoshi Kibuba noktaksü. Atangji ochishiri ne tenüng nung tenüngsang agütsütsü; Tamayazür Ne tsüngdang alitsü" (t. 12, 13). Raraji temogo, pai ashi, "Kenü anogo ni Na alidak alitsü, kong tiyazü, mezüngmeshi, tongpang rara mesüra temenen joko mali." Asenok Tsüngrem tesünep nung teti pelaa alitsü.

Na tamanger ka süra Tsüngrem temenen temerenshi nungi kümzükogo. Tanü na temenen mapa nungi kümzüktsü Pai mapa inyaker. Tsükchirtemi ne tenüng tajung mezüngmeshir. Tsüngrem dang teyari asoshi jang. Pai ne dang angashitsü, na tashi itdaksütsü, na metentsütsü. Tanü Pai ne nem takok ngudakjang.

## Uttar Pradesh nung Pentecostal Arogo mission centre ka bendoktsüogo

**October 13, 2023:** India Osangbener den jembidang kübok state ka nung Hindu sorkar ketdangser, Neha nationalist party sorkari Mishra-i, "State sorkari sorkar Pentecostal mission center ka li nung ozüng alema asüba bendoktsüogo; iba center ji kiojen ajak bendoktsütsü sorkar li nung asü, ta tai tonglokja kiji bendoktsüba den külemi pastor den nisung 18 apu.

October 11, 2023 nü Uttar Pradesh nung Jaunpur district kübok Bhulandih nung police den special squad kati Jeevan Jyoti Church mission center ji bendoktsüogo.

Iba center ya küm 10 dak tema liasü.

Uttar Pradesh nung Pentecostal Arogo ka nung ketdangser kati, "Tang tashi nung Police-i Pastor Durga Prasad Yadav densema mission den sendaktepa alir nisung 18 puogo," ta metetdaksü.

"Tang parnok jail nung lir saka parnok jail nungi anizüktsü atema inyakdar," ta paisa metetdaksü.

Police-i Mission center leni aoba lenmang ajakji mokdangogo.

Mission center ji ozüng alema asüba lir, ta lai ashi.

Ajisüaka iba mission den sendaktepa aliba ketdangser katibo, "Iba center indang shilem kabo aiben amentepa asüba building lir, aser ibajibo sorkar li nung asüba masü," ta metetdaksü.

Ajisüaka center shilem kabo sorkar li nung asüba lir, ta paisa shisem.

October 12 nü osangbener den jembidang pai, "Jaraji sorkar dang nungi temelaba agir asü saka o agi dang temelaba agütsü," ta metetdaksü.

Sorkarisa Mission dang center bendoktsüdag teindokba sen atema dollar sen 3,400 agüjang, ta metetdaksüogo, ta osang angazüker.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Sangwa**

(n) tenük agi angutsü akokba mapang (light)  
\* Sangwa mapang nungang office mapa inyaker.

**Sangwabang**

(adj) anepdang anü adoktsü anasa (dawning)  
\* Sangwabang nung ozütem asatsü tenzüker.

**OLONG PAITEP # 6666**

			1		2		3		4
5		6							
		7					8		
9					10	11			
				12					13
	14								
15									
			16		17			18	19
20					21		22		
							23		
24									

**TIPIEN**

- 3. Telunglen masü - (4)
- 5. Tanü-asüing - (4)
- 7. Külemi - (4)
- 8. O tali jembi - (4)
- 9. Songtem - (3)
- 10. Ozü tapu ka - (3)
- 13. T \_\_\_ daker - (3)
- 14. Mangdang masü - (9)
- 15. Alima nungi pila - (3)
- 16. T \_\_\_ ng - (3)
- 18. Tashi agi ola adok - (3)
- 20. Sen yong agütsü - (4)
- 21. Te \_\_\_ sü - (4)
- 23. Zübo aket - (4)
- 24. Tsükchirtemi longpanger rara - (4)

**LANGTSÜNGLEN**

- 1. Ishika - (3)
- 2. Nisan - (4)
- 3. Tatutsü - (4)
- 4. Amoa ao - (6)
- 5. Temelen anguba - (3)
- 6. Jang asepbpa - (6)
- 11. Kanga korema jashi - (4)
- 12. Tebang nung enok - (4)
- 13. Taa kecha mali - (6)
- 14. Asür li - (6)
- 16. Inyaktet - (4)
- 17. Entsü amokbang - (4)
- 19. Aonsotsü tsünüdak - (3)
- 22. Langka chinüa ait - (3)

**OLONG PAITEP # 6665 TELANGZÜBA**

**TIPIEN :**

- 1. Taa, 3. Teküm, 6. Aibelen,
- 7. Aut, 9. Ajizük, 10. Ojala,
- 11. Semer, 13. Sen, 15. Kiochtsü,
- 17. Itsük, 18. Kar.

**LANGTSÜNGLEN :**


- 1. Tai, 2. Asensor, 3. Tanü, 4. Kua,
- 5. Mitsüksü, 6. Azübenshi, 8. Lah, 9. Jangkok, 12. Akok, 14. Nashi, 16. Sür.

**NAI-A YA METETTER MA**



I dagi Karnataka state yimtiba Bangalore noksa nung angur. Bangalore dang ya 'Electronic City of India' ta-a ajar.

**Noksa nung meputepi aliba 10 bushiang**



**Assam sorkari kaketshirtem nem bicycles agütsür**



**Guwahati, October 13, 2023 (Agencies):** October 13 nü Assam Chief Minister, Himanta Biswa Sarma-i state nung shisaliok jenjang tajungba kümdaktsütsü atema tenangzükba agishiogo.

Sorkari Assam nung schools 4,000 tema yanglushiogo aser tesayur mapa tazüing asoshi nisungtem shimogo. Sorkarisa kaketshir nem cycles, computers aser

two-wheelers agütsür ta CM Sarma-i ashi.

Tanü CM Sarma-i state education ketdangsurtem den külemi kaketshirtem nem Rs 161 crore jenjang bicycles lema agütsüogo.

Sorkar school balala nung class 9 nung azünger kaketshir lakh 3.7 nem bicycles lema agütsü.

Kaketshirtem rongnung tetsür 56% lir aser iba ya

ajanga sorkari tetsür-tebur mebendangi benshiba aser tanur tetsürtem tashi itdaktsüba kuli agütsür.

"Tanur shiai shisaliok wadang nung takok tajung angutsü maongka agütsünür. Iba mapa ya tila ka dang saka onoki Assam lanurtem nem quality education agütsütsü nangzükba nung tongtipang shilem ka lir" ta Chief Minister Sarma-i metetdaktsü.

**Arunachal nung Rs 118.50 crores endoka apu 7 yanglutsü**

**Itanagar, October 13, 2023 (Agencies):** Union Minister for Road Transport and Highways, Nitin Gadkari-i ashi.

Nitin Gadkari-i financial year 2023-24 atema apu tenet yanglutsü osang metetdaktsüogo.

Setu Bandhan Scheme kübok Arunachal Pradesh nung apu 7 yanglutsü. Item apu ya Rs 118.50 Crores endoka yanglutsü aser connectivity tajungba akümtsü aser Arunachal

Pradesh nung alirtem taküm jenjang ajungkettsü, ta Nitin Gadkari-i ashi.

Centre sorkari Arunachal Pradesh ajungkettsü aser renloktsü tenangzükba agia aliba nung item apu yanglutsüba mapatongtem adener. Northeast nung connectivity tajungba akümtsü aser rongsenketzüing renlokdaaktsütsü atema sorkari maparen balala inyaker, ta paisa ashi.

Setu Bandhan Scheme ya connectivity tajungba akümtsüba infrastructure projects yaritsü atema tenzüka lir.

Arunachal Pradesh nung apu tasemtem ya Lachan, Goang, NH-313, West Kameng District, Lower Dibang District, Lower Siang District, East Siang District aser Lower Subansiri District nung yanglutsü.

**Bhattadev University kaketshirtemi state sorkar dang mepelar**

**Guwahati, October 13, 2023 (Agencies):** Assam sorkari

tetsüiba anogo ananü tatidang liaka playground nung sentongtem ayonga agiba atema Bhattadev University kaketshirtemi tebilemtsü khuret abenba metetdaktsüogo.

"Onoki tatidang agütsüdang telok balalai playground nung loudspeakers amshiba ajanga meinpronger" ta kaketshirtemi ashi.

"Tesayur aser kaketshir nem

facilities shitak agütsüba ajanga dang learning environment tajung alitsü aser ibaji kima nungi meinprong malitsüla" ta kaketshir Bijit Khataniar-i ashi.

"Anungji onoki education minister dang kaketshir nem tetsükdaktsü magütsütsü aser university campus nungi pandals agientsü mepishir" ta paisa ashi.

"Tanü parnoki university campus nung sorkar schemes dak sendakba political banners enokogo" ta kaketshir Dimpal

Patgiri-ia ashi.

"Onok university campus anasa college aser school aika lir. Political aser non-political telok balalai loudspeakers amshiba ajanga kaketshir aika timtem ajurur" ta paisa ashi.

"Sorkar ket nung senotsü peria maliba ajanga ketdangsurtemi aou agi classrooms yanglu saka sentong balala aser pandals atemabo sen aika endoker" ta Patgiri-isa ashi.



Assam Police aser Border Security Force (BSF) ketdangsurtemi Brihostibar aonung Cachar district nung Yaba süngjang lakh 2.6 apuba sülen agiba noksa angur. Ketdangsurtemi Katakhal nung apuba Yaba süngjang ya international market nung Rs 70 crore shi alang liasü aser Sports Utility Vehicle (SUV) gari ka nung miima bena aliba angu. Yaba süngjang ya Mizoram kübok Champhai district nungi Assam aser Meghalaya ajanga tangaleni bener aodang apu saka tammang nung mozü shibelenertem jena otet.

**GOVERNMENT OF NAGALAND  
DIRECTORATE OF HIGHER EDUCATION  
NAGALAND: KOHIMA**

NO.HED/SCHO/2022-23

Dated Kohima, the Oct, 2023

Notification to Institutions of Nagaland on Scholarship Schemes implemented by the Directorate of Higher Education

- 1) Institutions yet to empanel for scholarship are asked to empanel at the earliest. Empanelment form is available on <https://scholarship.nagaland.gov.in>
- 2) INOs of empaneled institutions of Nagaland yet to receive login credentials may email to [hescholarship@gmail.com](mailto:hescholarship@gmail.com).
- 3) Only those applications verified online by the INOs can be scrutinized by the Department. Hence, the Department will neither be responsible for applications not verified online by the INOs nor entertain any request to consider such applications.

Sd/-  
(Dr. A NSHOCHA)  
DIRECTOR  
HIGHER EDUCATION



**केन्द्रीय आयुर्वेदीय विज्ञान अनुसंधान परिषद्**  
आयुष मन्त्रालय, भारत सरकार  
जवाहर लाल नेहरू भारतीय चिकित्सा एवं होम्योपैथी अनुसंधान भवन  
61-65, संस्थानिक क्षेत्र, समूह 'डी' ब्लॉक, जलकपुरी, नई दिल्ली-110058  
CENTRAL COUNCIL FOR RESEARCH IN AYURVEDIC SCIENCES  
Ministry of AYUSH, Govt. of India  
Jawahar Lal Nehru Bhariya Chikitsa Evam Homoeopathy Anusandhan Bhawan  
61-65, Institutional Area, Opp 'D' Block, Janakpuri, New Delhi-110058

ग्राम : आयुष  
ग्राम : "AYUSH"  
फ़ोन : 28520748  
EPBX  
28525852, 28520501  
28529234, 28525831  
28525862, 28525883  
28525897

**Window Advt. No. 06/2023**

CCRAS nung deputation nung pay level-7 nung Accountant post ka asoshi iba osang employment news nung adoker anogo 30 tsungta application meshir. Application form aser danga osang tejangja ya Council indang website [www.ccras.nic.in](http://www.ccras.nic.in) nungi download sùtetsü.

**Administrative Officer (Rectt.)  
CCRAS, New Delhi**

cbc 17216/12/0025/2324

## Israel-i Gaza nung alir nisung million 1.1 dang south leni aotsü tuyu

**Tel Aviv, Mongputeni/Oct. 13 (Agencies):**

Israel army temi Gaza City aser Gaza Strip north tsütsü aliba civilian ajunga dang pei aliba tesem nungi ainshitsü totuyuba agütsüogo. Tesem ajaklen sapanger aliba Gaza nung alilen nungia amaksü tsüboa alidang iba osang ya sangdoktsür.

Ghonda 24 tsungta Gaza north tsütsü aliba nisung million 1.1 ainshiang ta Israel-i Hokulbarnü totuyuba agütsüba ya tebilemtsü tulu lir ta United Nations-i shiogo.

Honibarnü ajungbena Hamas teloki Israel amakba sülen anogo tenet tashi rara tesem ajaklen nokdang ta sangdonger lia Gaza City nung alirtem dang Gaza Strip telung leni jena aotsü ashi, kong nisung million 2.3 shi alir.

Hamas telungpurtem Gaza City kübok longpok nung atsükoka lir ta Israel-i ashir.

"Ibai nenok kumzüka alitsü asoshi lir. Meyipa arutsü asoshi temelaba agüja sangdongba sülen ang nenok Gaza City-i meyipa arutetsü. State of Israel indang security fence leni maotsüla," ta Israel mitkar temi ashi.

Aruya aliba anogotem Israel army-i maneni Gaza City nung operation tesashi agitsü aser civilian tem meyirutsütsü merangtsü, ta ashi.

Hamas-i October 7 nü ajungbena Israel amakdang nisung 1,300 dak tema tepsetba sülen Israel-i Gaza nung bomb pokloktsüdang nisung 1,500 dak tema takum samatsüogo aser parnok rongnung tasadang ka tanur aser tetsürtem lir.

Israel army temi pei aliba tesem yutsür ainshitsü tuyuba ya taila olulu lir, ta Gaza Strip nung yimsü asüba telok, Hamas-i ashir.

Hamas Authority for Refugee Affairs-ia north tsütsü alirtem dang pei kidang süngjema alitsü aser tashiyim amshia amokbaner temi tesempatsü 'psychological' rara nung tasü ita nokdaksü ashi.

Gaza north tsütsü alir ajunga nem totuyuba agütsüba nungya UN staff aser UN school aser danga facility nung jenoka alirtem densema lir.

"Meimchir asoshi timtem majurui iba ama inyaksü ya tamakoktsü asütsü ta United Nations-i angateter," ta odongtar Stephane Dujarric-i ashi.

"Iba ama totuyuba ya shidak süra, lepa reprangshitsü UN-i ajungshir," ta ashi.

Israel army ajanga iba totuyuba agütsüba sülen Palestinian refugee asoshi UN agency ajanga mera balala agir ta ashi.

"UNRWA ajanga central operations centre aser international staff tem south leni belenogo aser maneni nüburtem aser staff tem aser Palestine Refugees in Gaza den yariteper," ta X nung zülutsü.

Israel mitkari ghonda 24 tsungta civilian ajunga ainshitsü agütsüba sülen northern Gaza nungi mozüki nung alirtem south tsütsü belener aotsü ya tamakoktsü, ta Gaza nung local health authorities ajanga osang sangoktsüogo, ta World Health Organization ajanga Hokulbarnü ashi.

"Kanga sashia yirur nisungtem mechanical ventilators ama life support nung lir. Anungji item nisungtem anizüker aotsüba ya tasüba temrenshi lir. Health worker dang yamaji inyaksü ashiba ya taochi maliba mapa lir," ta WHO odongtar Tarik Jasarevic-i ashi.

## Gaza Strip nung nisung 423,000 dak tema pei kidang malir: UN

**Geneva, Mongputeni/Oct. 13 (Agencies):**

Hamas-i amakba tayang kepzüka Israel-i bomb pokloktsüba sülen Gaza Strip nung nisung 423,000 dak tema pei kidang nungi jena aotsüsa kumogo, ta United Nations-i ashir.

Brehostibar aonung tashinung Gaza nung pei ki yutsür tesem balala nung prokshia alir nisung 84,444 jungogo, anungji 423,378 akumer, ta UN humanitarian agency OCHA ajanga Hokulbarnü sangdong ka nung ashi.

Honibarnü ajungbena amakba tayang kepzüka Israel-i Gaza Strip nung bomb pokloktsüba mapang iba sangdong ya agütsür.

Hamas telungpuri jila tila, alu aser lisem lima nung kenten benjong ka amakdang nisung 1,200 dak tema taochi makai tepset aser ano nisung 150 shi Gaza-i pua bener ao.

Israel-i tayang kepzüka Gaza nung tayimtsü aser artillery amshia amaker, ki o jen aoyi kumtsür aser nisung 1,400 dak tema tepsetogo, kong nisung million 2.3 shi alir.

Israel-i ano iba Palestinian

territory nung ali len nungia amaksü renemshir.

"Israel-i anüing, tziyüm aser ali nungi bomb tesashi pokloktsüba manener," ta OCHA ajanga ashi.

"Tesüiba ghonda 24 tsungta nisung jenti aliba tesem nung ki o jen nung tenük yoker amak aser raksatsü."

Nisung 270,000 dak tema - pei ki yutsür tesem balala nung prokshia alir asem nung shilem ana - Palestinian refugee yaria UN agency, UNRWA ajanga lapokba school nung atsükoka lir.

Ano nisung 27,000 jungnüa Palestinian Authority ajanga lapokba shool tem nung jenoka lir aser nisung 153,000 dak tema kinunger aser kidanger aser nüburtemi amshiba tesemtem nung jenoka lir.

Honibarnü mamakdang nisung 3,000 shi iba tesem nung pei ki yutsür tesem balala nung prokshia liasü, ta OCHA ajanga ashi.

Israel-i bomb pokloktsüba nung nisung aliba aser maliba ki 752 samatsüogo, aser yangji housing units 2,835 lir, ta Gaza Ministry of Public Works and Housing ajanga OCHA dang ashi.

Housing units 1,800 jungnüa meyanglutetsüsa mesüra nisung melitetsüsa raksaogo, ta ashir.

Bomb pokloktsüba ajanga civilian infrastructure tali raksatsüba indanga UN agency ajanga khuret lemsatepa liasü.

Shisaliok agütsüba tesem 90 nung bomb poklokja raksatsüogo aser school kabo okshia samatsü aser item ya UNRWA school 20 aser Palestinian Authority ajanga lapokba school 70 alitsü.

"Mosque 11 dak bomb poklokja raksatsü aser ano tekülem ki aser mosque tenet nunga kongshi," ta OCHA ajanga ashi.

Tayimtsü amshia amakba ajanga tziübo trok, tziü pump asüba station asem, tziü rizünga ayuba ka aser desalination plant ka raksatsüogo. Item yagi nisung 1,100,000 nem tajemtsü tziü agüja liasü.

## Sen billion \$6 agütsütsü US-i nangzükba ama inyaksüla: Iran

**Tehran, Mongputeni/Oct. 13 (Agencies):**

Hamas-i Israel amakba mechi Qatar tetsungtai ia soita aliba sen billion \$6 agütsütsü nangzükba ama United States-i inyaksüla ta Iran-i ashi.

Tehran ya Hamas den tesendaktep lir südi ta temolung melemi lir, aser hopta tatemlen Palestine telungpuri Israel south tsütsü arütsü alema aita nisung 1,300 dak tema tepsetba sülen aikati Iran dak tamang makar. Ajisüaka Hamas-i amakba nung tesendaktep kecha mali ta Iran-i maneni ashir. Israel-i iba lendong tayang kepzüka Hamas alidak bomb pokloktsür, Gaza Strip ajungalen mokdang aser Palestinian territory nung nisung 1,500 dak tema tepsetogo.

"Tezüngzüktep meyipa magitettsü ta US sorkari

meteta lir. Iran nübur meyong sen ya Iran nung nungdakba alitsü asoshi Islamic Republic of Iran sorkar nem lemsükja lir," ta Iran indang permanent mission to the United Nations, Ali Karimi Magham-i X nung ashi.

Soita aliba sen South Korea nungi Europe dangi yoktsü aser tatsüka lir Qatar dangi yoktsüba ya taoba ita United States aser Iran tsungta tepuokdak alir nisung pongu melentepba nung shilem ka liasü.

Qatar bank nung yua aliba Iran nung sen billion \$6 ya Iran-i tangbo magitettsü, ta United States-i Brehostibarnü shia liasü.

Honibarnü Hamas-i Israel amakba sülen Iran nungeri iba sen amshitsü indang ya yimjak nung jembia liasü. "Iran-i

mapang telatet makai iba sen mamshitetsü," ta US ketdangsur kati shia liasü.

Tel Aviv nung osangbener senden ka nung jembodang, Iran-i sen billion \$6 ya magizük aser meindok, ta US Secretary of State Antony Blinken-i shia liasü. "Iba sen onoki kanga junga tenük yoka lir aser soita ayutsü temeden lir," ta pai ashi.

Iba sen ya nüburtem nungdakba nung dang amshitsüsa linüki ketdang asür, ta pai ashi.

United States aser Qatar nati Iran nem iba sen mamshidaksütsü molungtepogo ta Brehostibarnü US osangkaket balala nung adokba sülen iba sangdong ya agütsü.

Hamas-i Iran amakba nung Tehran maden, ta Iran indang Supreme leader Ayatollah Ali Khamenei-i Mongulbarnü shia

liasü.

Iran nung nungdakba nung amshitsü asoshi South Korea nung account ka nungti Qatar dangi transfer sütsüba sen ya meyipa magitettsü ta US sorkari meteta lir, ta Iran indang UN mission ajanga ashi.

Taoba Tir Donald Trump kübok Washington-i Iran nung totzü bendanger dang ayokba ajunga nokdanga 2019 küm par bank tem nem temrenshi/tenokdangba agütsüba sülen Iran totzü ayokba nungi anguba sen Seoul nung soita yua liasü.

"Sen ya Iran nüburtem meyong, Iran nung nung nungdakba aser sanction mesüi aliba alitsü asoshi Government of the Islamic Republic of Iran atema lemsükja lir," ta Iran's mission to the United Nations ajanga ashi.

## Advisor Tovihoto-i 9th Horsepower Challenge tenzüksü



MLA aser Advisor, H. Tovihoto Ayemi-i Hokulbarnü Agri Expo, Diphupar nung 9th Horsepower Challenge tenzüksüba mapang tangokba noksa ka yangi angur.

**Dimapur, Mongputeni/Oct. 13 (TYO):** MLA aser Advisor, Tribal Affairs & Election Department, H. Tovihoto Ayemi-i asemnü 9th Horsepower Autocross Challenge tenzüksü, koba Nagaland Adventure Club ajanga Nexa Jimny den lungjemer Hokulbarnü Agri Expo, 4th Mile, Diphupar nung tenzüksüba atema pai

Tesemdanger tongti ka ama iba sentong nung o tatsüka jembidang, alima nung saisapong kanga nungtugu akumba mapang Nagaland nunga motorsports jenjang tajungba akumba ngua ajungmesor, ta Tovihoto-i ashi. State nung motorsports renloka tejangrartem anir arutsüsa sentong balala ayongzükba atema pai

Nagaland Adventure Club nem pai tenüngsang agüja liasü.

North Eastern region balala nungi iba sentong nung shilem agirtem dang yimya tajung amshia bendanga agütsür pei nükjidong nung takok angutsü pai ayongzük.

Paisa saisapong ajanga nüburtem tsüngta tesendaktep aser telungjem adokdaksür, ta ashi.

## Kohima nung 3rd Inter-Department Badminton Tournament tenzükogo

**Dimapur, Mongputeni/Oct. 13 (TYO):** Nagaland Legislative Assembly Multi-Purpose Hall, Kohima nung October 13, 2023 nü 3rd Inter-Department Badminton Tournament tenzükogo.

Iba asayamung ya Vyasas R, IAS Commissioner & Secretary to the Government of Nagaland ajanga lapokja liasü.

Vyasas R-i iba asayamung lapoktsüba mapang asayatem dang saisapong ama asayamung mapang dang masü saka anogoshi lipaliru nung yimya tajung amshitsü ayongzükba liasü.

Badminton asayar ka ama pai ajangshiba lemsatep aser court nung külemi asyartem bilemteta liasü.



IDBC Kohima ajanga iba asayamung ayongzükba atema Vyasas R-i pelaba lemsatep aser tajungtiba nung asayatsü moaja liasü.

Ananü IDBC Kohima asayamung nungya department 24 nungi asayar 100 dak temai shilem agir.

Item rongnung arishi küm 78

tain international sapang nung asayar Bendang Jamir ya tambo alitsü.

Iba asayamung tenzükba sentong nung menden Kelhikha Kenye liasü, Keneiselhou Solo, Pastor, ACRC ajanga sarasadem aser IDBC Kohima tir Shanavas C, IAS ajanga pela agizükba o jembia liasü.

## Immunization Campaigns atema...

Administration, sendaktepa aliba department balala aser stakeholders temi tanen makai yaritepba asoshia pai pelaba lemsatepa liasü.

Iba senden nung NHAK team ajanga MDR (Measles, Diphtheria, and Rubella) indang osang agütsü aser Indian Social Responsibility Network (ISRN) nungi züngsem kati July nungi October 2023 tsüngta jila aser yimtsüngtem nung IMI/RI dak sendakba inyakyim, tajangshibatem lemsatepa liasü.

City Embrace Model (CTFI-CEM) mapa inyaksü nungloktsüba telok nungi züngsem kati iba inyakyim indang osang agütsü.

Iba project ya Ministry of Health & Family Welfare,

Government of India ajanga tenzük, kong Sub-Centers, Urban Primary Health Centers (UPHCs), aser Primary Health Centers (PHCs) balala nung micro-planning aser orientation sentongtem densema lir.

Tarutsü nung yimti kübok tesem balala nung outreach sessions ayongzüksü sentong lir ta parnoki ashi.

Ajisüaka ano infrastructure peria maliba, nübu agi anüngba aser sendaktepa aliba department tem tsüngta amalitem junga maliba ajanga timtem ajuruba indanga osang agüja liasü.

Item tayongzükba koktettsü aser project takok ngua inyaktettsü asoshi stakeholders ajanga lungjemshir inyaksü

ayongzük.

Iba senden nung Vaccinators and Community Mobilizers pezü, Pfuchama yimtsüng nungi Khrieleno Seletsu (ASHA), Jakhama Block nungi Kekhriesenuo Kintso (CHO, Mima HWC) aser Kohima Block nungi Bokali Yeptho (ANM) aser Sevelu Puro (ASHA) Keyake nungeri bendanga agütsür inyakba yong kulizüng kakat den sempet agüja liasü.

Iba senden ya session ana lemsar agi, kong mezüng session nung menden Deputy Commissioner Kohima, Shanavas C IAS liasü aser tanabuba session nung menden SDO(C) Kohima, Pichano liasü.

(Tapak 2 nungi...)

## 3rd Kohima District Chess Championship nung nisung 42 tokteper

**Kohima, Mongputeni/Oct. 13 (TYO):** Kohima District Chess Association (KDCA) ahabfa Nagaland Olympic Association Complex, Kohima nung ayongzükba 3rd Kohima District Chess Championship nung tetsür ka densema asayar 42-i ashilem agir.

KDCA indang taoba tir aser advisor, Kedihoto Puro-i ananü iba championship tenzükba sentong moatsü aser shilem agirtem dang chess ya 'professional' kumdaksütsü ajungshia liasü.

Iba asayamung tenzükba sentong ya Medolenuo Ambrocia Loucü lenisüba kübok agia liasü, kong Associate Pastor, CRC AG Road Kohima, Kevilezo

Rüpreo ajanga sarasadema tenzük.

KDCA tir Vizosielie Khoubve-i pela agizükba o jembia aser Thenuviü Kets ajanga temeja ken ka tena liasü.

Iba championship ya category ana lemsar asayar. Ka Open aser ka Under 16 telemsa nung asayar. Category anaprong nung takok angur nem trophy den senpet yamai agütsütsü:

General category: Champion - Rs 20,000; Runner's-up - Rs 15,000; 3rd - Rs 10,000 & 4th - Rs 5,000. Under 16: Champion - Rs 7,000; runner's-up - Rs 5,000; 3rd - Rs 3,000 & 4th - Rs 1,500.

Iba asayamung Honibarnü tembangtsü.

## Tanü 23rd NSF Martyrs Memorial Trophy final nung Liangmai FC aser Red Scars FC asayatsü

**Kohima, Mongputeni/Oct. 13 (TYO):** Angami Students' Union ajanga Indira Gandhi Stadium nung ayongzükba 23rd NSF Martyrs' Memorial Trophy football asayamung final nung Manipur nungi Liangmai Football Club aser asayar tejen temi tentetba Red Scars FC asayatsü.

Final match ya Honibar nikongdang 4:30 ako nungi tenzüksü, kong tesemdanger tongti ama Nagaland Football Association tir K. Neibou Sekhose adentsü.

Team anaprong ya iba asayamung final nung mezüngbuba asayar alitsü.

Taküm iba asayamung preliminary round nung Liangmai FC yagi Knight Sporting Club, Chozuba madak goal 2-0 agi akok aser match tanabuba nung Tiema Khe Kidima madak 7-0 agi akok aser quarter final nung End of an Era madak 6-2 agi koka liasü.

Semi-final nung Liangmai FC yagi defending champion New Market FC nem goal ka agüja tsükdaksü.

Kasa mapang asayar tejen kar dener aliba Red Scars yagi first round nung All Nagaland 2 wheelers Taxi Association madak 6-0 agi akok aser round tanabuba nung Viswemi FC madak 2-0 agi koka liasü.

Quarter final nung Red Scars yagi Manipur Football for Change Academy (F4C) madak 2-0 agi akok aser semi-final nung 3-1 agi United FC

Piphema tsükdaksü.

Linük asoshi asür kaketshir asür Kekuojalie Sachü aser asür Vikhozo Yhoshü na nungtem nung 'Goal for Peace' omen kübok iba asayamung ya September 18, 2023 nü tenzüksü liasü. Taküm iba asayamung nung Nagaland nungi team 31 aser Manipur nungi team asem-i shilem agia liasü.

Tang tashinung iba asayamung nung goal timtiba agütsür ya A Yhome FC nungi Yhoto (9 goals) alitsü aser iba sülen Red Scars nungi Yhunshalo Kemp (goal tenet) aser Liangmai FC nungi Kawijibo (goal trok) alitsü.

Iba asayamung tenzükba matches 32 asayaba nung goal 148 tashi agüja lir aser nisung 13-i hat-tric agütsüteta lir aser nisung 22 nem yellow card aser ana nem red card agüja lir.

Iba asayamung nung champion team-i sen lakh 2.50 den running trophy aser kulizüng kakat agizüksü, runners-up teloki sen lakh 1.50 den kulizüng kakat agizüksü. Semi-final nung tsükba telok ana nem senpet sen 35,000 agütsütsü aser quarter final nung tsükba team pezü nem sen 20,000 agütsütsü.

Kija sempet asoshi Best Goal, Best Midfielder, Best Defender & Highest Scorer nem sen 10,000 den kulizüng kakat aser Player of the Tournament nem scooty ka agütsütsü.

### BILEMDANGANG

"O tajung jembiba nung takoksa mali."